

Siunnersuut uunga: Imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaata allanngortinnejarneranik Inatsisartut inatsisaat nr. xx.xx 2017-imeersoq. (Imigassanik kimittuunik kimikitsunillu nioqquteqarnermi ammasarfiiit sivitsorneqarnissaat)

(Inatsisartunut ilaasortat Randi Vestergaard Evaldsen aamma Justus Hansen, Demokraatit)

### **Akissuteqaat**

(Peqqissutsimut Naalakkersuisoq, Agathe Fontain, Inuit Ataqatigiit)

### **Siullermeerneqarnera**

Ilaasortat imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaata allannguiteqartoqarnissa, tassa imigassat pillugit inatsimmut maannamut atuuttumut imigassanik kimittuunik nioqquteqartarnerup ataasinngornermiit arfininngornermut nal. 21.00 tungaanut sivitsorneqarnissa, pillugu siunnersummut Naalakkersuisut qujapput.

Ammasarfiiit sivitsorneqarnissaat inuiaqatigiinni annertuumik kingunerluteqarsinnaavoq, taamaattumillu ammasarfiiit pillugit oqallilluarnissaq pisariaqarpoq.

Naalakkersuisut uparuarusuppaat ammasarfiiit sivitsorneqarnerat Nunarsuarmi Peqqissutsimut Suliniaqatigiiffiup WHO-p nunarsuaq tamakkerlugu imigassaq pillugu periusisiaani siunnersuutanut toqqaanartumik akerlummat. WHO siunnersutiga inuiaqatigiinni pitsaliuinermi iliuusissani imigassamik aalakoornartortalinnik nioqquteqartarneq killilersorneqassasoq, aamma tassani ilaalluni ammasarfinnik ullunillu ammasarfinnik sivitsuineq.

Danmarkimi Kalaallit Nunaannilu imigassartorneq Nunani Avannarlerni annerpaat ilagaat, taamaattumillu Island Savalimmillu, Nunani Avannarlerni imigassamik atuinnginnerpaaffiusut, isumassarsiorfiginerusariaqarpavut.

Naalakkersuisut maanna imigassanik aalakoornartortalinnik nioqquteqartarneq sassaallertarnerlu pillugu Inatsisartut inatsisaat iluarsaatileruttorpaat, tassani siunnersuut uunga: Imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaata allanngortinnejarneranik Inatsisartut inatsisaat nr. xx.xx 2017-imeersoq ukiaanerani ataatsimiinnermi 2017-imi saqqummiunneqarumaarluni.

Taamaattumik Naalakkersuisut innersuussutigaat Imigassanik kimittuunik kimikitsunillu nioqquteqarnermi ammasarfiiit sivitsorneqarnissaanut siunnersuut ukiakkut ataatsimiinnermi 2017-imi saqqummiunneqassasoq, taamaallilluni imigassat pillugit inatsimmut maannamut atuuttumut tamarmiusumut ilanngullugu suliarineqassammat.